

LIS PREDICJIS DAL MUINI

di pre Josef Marchet - Udin, 1965

Il nît

O soi a visâus che doman e je messe aes nûf inte gleseute di Prât Zenâr, dulà che une volte si faseve la sagre de Sacre Famee.

Cumò, si sa, la sagre e je colade: o par vie de stagjon pôc adate o par vie che lis fameis no àn plui bisugne di protetôrs in paradîs.

Eh, nol covente ridi, Toni Brustul! Juste tu, ve: la tô famee e je un spieli, che dut il paîs al po lâ a cjalâsi dentri. La tô cristiane ti à implantât inmò za dîs agns, par vie che tu i puartavis in cjase lis furmiis rossis cjapadis sù pes braidis cun... chê altre; to fi Turo al ti à menade dongje la Vera de Gnoche, vergjine e pure tant che la gjate de comari; tô fie Sunte, doi mêś dopo lade a marît, e je tornade a cjase parcè che il romagnûl che e veve cjolt la tratave masse ben. E tu, Vigji, no sta voltâti indaûr a cjalâlu, che tu âs ce cjalâti te: che la cantine plene e la femine cjoche no puedin lâ da pâr, nancje là di te, no mo? E tu, Minut, che tu i truchis il comedon a to cusin, cjaliti un lamp in ce sest che tu sês; no ti isal mai capitât che cualchi forest, viodinti pe strade, al vebi tirat fûr il tacuin par fâti la caritât? Ma no la tô Marisa ve. Chê se e puarte cimade: un capoton cu la pistagne di pêl, che e semee juste une gjambe di soreâl, un cjapielin a spiç come il gno distudecjandelis, lis ongulis rossis e un miezut di farine pe muse. Cjo! Tu sês lâ a cirîle sul breâr, no mo? E cumò tegnite. Ancje gno nevôt Gustin de Menie al à cjolte une balarine e cumò nol olse a vignî in glesie, parcè che se al tire jù il cjapiel, al à pôre di meti in mostre un sterp di cuarnissins. E al è inmò cualchidun altri che nol po vignî in glesie par... afârs di famee. Sono fameis chês, o sono... come là di Burin, che si menin lis bestiis co a son in calôr (Che Diu mal perdoni!).

Disêtni codarûl tant che o vuelis: ma chescj agns, che o mi impensi jo, no jere cussì. Moscjis a 'nd è stadis simpri par ogni cjase, ma si paravisi di lôr cence sdrumâ il fogolâr: mi capîso? Al jere l'esempli di chês siet vot fameonis ae antighe, che a si tignivin unidis, cuntune vore di braçs che a lavoravin ce a cjase ce pal mont, e ducj a puartavin dongje la lôr part, a sparagnavin, a ingredeavin, a cuistavin, e i afârs ur lavin benon; i oms a si tignivin in bon, lis feminis a imparavin a adatâsi, a vivi insieme cence tantis paronancis, a fâ la part dal lôr dovê cence tantis crestis e tancj capricis. Chês a jerin fameis, e no locandis di lâ a durmî di gnot. La famee di Ustin Safit; la famee di Meni Gabot, cun trê fradis maridâts che a lavin indenant come orlois; la famee di Blasut Blason, che la domenie e jemplave la glesie di bessole; la famee di Basili

Repin, che al jere un gust a lâ in file là di lôr, un plui mataran e gjubiâl di chel altri, come che a jerin! E brave int: legris fint che si vûl, ma galanzumign, che il Signôr al à di vê pierdût il stamp par fasint di compagns.

Dopo, cu la zoventût dispatussade, al è lat dut in grum: barufis, divisions, causis in preture, palanchis mangjadis cui avocats, cjasis disfatis, robe lade a tocs, rancûrs, svindics e miserie. Il taramot al à tacat in chês volte de prime vuere grande, cu la forestarie capitade dongje a dâ il trist esempi, cui soldâts tornâts a cjase plens di novitâts inte melonarie, cu lis pretesis di cualchi nuvice rivade di fûr vie... E la seconde vuere e à finît di rompi lis citis.

Jo no crôt che si puedi tornâ indaûr, parcè che mi pâr che, in chest mont, no si va mai cui agns a cessecûl. Ma un fregul di sâl inte coce, un fregul di timôr di Diu, un fregul di sapuartazion si podarès ben vê: e al tornarès cont. La buine armonie intune cjase e je une fortune, e je un capitâl che nissun sacrifici nol è masse grant par paiâlu. E il pinsîr di tornâ a cjase, dopo di vore, e cjatâ il fogolâr clip, une bocje da ridi, une buine peraule e la sigurece di polsâ in sante pâs, al è une paie plui grande di chês che al po dâ cualsei paron. Jo no ai plui une famee, e la colpe no je ni mê ni di nissun. Chel la sù al à destinât cussì. E o varès un grum di invidie di chei che a àn un lôr nît. Ma se mi cjali ator, se mi met a considerâ lis fameis che a vivin dongje di me, o capìs che a son nîts, ma nîts di liparis: e mi ven voie di ringraziâ il Signôr, che mi à lassat bessôl tant che un barbezuan.

E cun cheste us doi la buine sere.